



Cumün da Valsot

Tel. +41 (0)81 861 00 60 • Fax +41 (0)81 861 00 61 • info@valsot.ch • www.valsot.ch

Poz 86 • CH-7556 Ramosch

Affischa

Suprastanza cumünala dals 11.05.2020

Presidi: Peer-Puorger Victor
Participant/s: Mayer-Schlegel Armon
Caviezel-Domenig Ursina
Kirchen-Werro Armon
Riatsch-Fedi Fadri
S-chüsà:
Protocol: Oswald Gian Claudio
Fabrica: Paulmichl-Rodigari Albin
Giasst/s:

tractandas	tema	respunsabel
1	0120 Executiva Acconsentimaint protocol	tuots
2	0220 Uffizi da fabrica Dum. da fabrica no. 048/2019, renovaziun fatschadas da la chasa, Waser Heinz und Sabin, parcella no. 53, Permez 152, 7557 Vnà	vp/ap
3	0220 Uffizi da fabrica Dum. da fabrica no. 021/2020, rimplazzamaint da l'antenna e redistribaziun da las prestaziuns da transmissiun dals bindels da frequenza vegls e novs (nouv eir 5G), Sunrise Communications AG, parcella no. 7499, Farina Cotta 1-354, 7558 Strada	vp/ap
4	0220 Uffizi da fabrica Dum. da fabrica no. 022/2020, sanaziun dals tirs da schaibgia (corp da guardgias da cunfini e biatlon), fabrichar oura il tir da biatlon, Cumün da Valsot, parcella no. 6038, Ischla Sclamischot, 7558 Strada	vp/ap
5	0220 Uffizi da fabrica Dum. da fabrica no. 013/2020, drenascha cun sfuondraziun, Brosi Dr. Georg Jürg, parcella no. 10314, Griosch 257, 7557 Vnà	vp/ap

6	0220 Uffici da fabrica Dum. da fabrica no. 014/2020, local tecnic nouv, Caviezel-Mächler Giovanni, parcella no. 6187, La foppa 1-169, 7558 Strada	vp/ap
7	0220 Uffici da fabrica Dum. da fabrica no. 017/2020, ingrondimaint piazza da parcar, Groen Sophia, parcella no. 26, Favgia 208, 7557 Vnà	vp/ap
8	0220 Uffici da fabrica Dum. da fabrica no. 020/2020, renovaziun dal tet e da las fatschadas (rimplazzamaint fanestras), Denoth Marco, parcella no. 323, Poz 27, 7556 Ramosch	vp/ap
9	0220 Uffici da fabrica Dum. da fabrica no. 010/2020, lobgia nouva / fatschada süd, Gmür-Zorzi Paul, parcella no. 279, Schilana 73, 7556 Ramosch	vp/ap
10	8120 Vias champestras Limitaziun dal pais sün vias champestras	vp/ap
11	0210 Administraziun cumünala Reglamaint davart ils agüds da chatscha Elecziun d'üna cumischiun	vp/am
12	9630 Stabels da la facultà da finanzas Vendita da la chasa da scoula Tschlin Proget CELIN VIVA, Angelo Andina	vp/fr
13	0120 Executiva Orientaziuns	tuots
14	0120 Executiva Varia (suprastanza cumünala)	tuots

0120 Executiva

55 Acconsentimaint protocol

Ils protocols da las sezzüdas dals 22 e dals 27 d'avrigl 2020 vegnan approvats.

0220 Uffizi da fabrica

56 Dum. da fabrica no. 048/2019, renovaziun fatschadas da la chasa, Waser Heinz und Sabin, parcella no. 53, Permez 152, 7557 Vnà

Avant la sezzüda da supranza ha chattà lö illa fracziun da Vnà üna visita oculara. Il böt da quella d'eira da's far ün purtret dal cumün in connex culs sgrafits vi da las fatschadas. Andit a quista ha dat la dumonda da fabrica da Heinz e Sabin Waser. Els vulessan refar la fatschada da lur chasa sainza sgrafits. Las fatschas da lur chasa sun ornadas cun numerus sgrafits. Tenor la perizia da la cussgliadra da fabrica sun quels gnüts fats ourdvar bain, eir schi nu sun uschè vegls. Implü sun quels in ün bun stadi e d'ota qualità, uschè chi sun degns da gnir protets. La visita oculara ha dat la pussibilità da's far ün purtret in connex cun sgrafits i'lla fracziun da Vnà. Illa discussiun in chasa cumünala vegn discussiunà co chi's vögl proseguir in chosa.

La supranza decida da refüsar la dumonda da fabrica. Las fatschadas da lur chasa as rechattan in ün bun stadi, cun exepziun d'ün per flachas e da l'ümidità chi va sü dal soccal. La supranza es implü da l'avis chi vaglia da mantgnair ils sgrafits.

0220 Uffizi da fabrica

57 Dum. da fabrica no. 021/2020, rimplazzamaint da l'antenna e redistribaziun da las prestaziuns da transmissiun dals bindels da frequenza vegls e novs (nouv eir 5G), Sunrise Communications AG, parcella no. 7499, Farina Cotta 1-354, 7558 Strada

Il capo spiega la dumonda inoltrada in connex cull'antenna da telefon il territori da Farina Cotta. La Sunrise Communication AG ha inoltrà la dumonda per far rimplazzamaints. In quist connex es eir previs d'adattar las distribuziuns da las prestaziuns da transmissiun dals bindels da frequenzas vegls e novs. Davo cha quellas lavurs füssan realisadas dispuoniss il cumün da Valsot sur d'üna rait da 5G. In vicinanza da quell'antenna as rechattan trais chamonnas. Las limitas d'irradiaziun vegnan eir tgnüdas aint cull'antenna nouva. Il manader tecnic infuormescha ch'el haja in quist connex fingià fat sclerimaints pro'l uffizi per la natüra e l'ambiant, quel va d'accord cul intent. Il cumün es liber da decider scha la dumonda vegn publichada o brich. I's tratta d'üna dumonda da bagatella chi nu pretenda la publicaziun.

La supranza decida da sistir la dumonda analog al cumün da Scuol fin in marz dal 2021 sperond cha fin là as saja daplü sur da l'effet cha quellas antennas han, per exaimpel eir in connex culla sandà. Eir davart dal Chantun e da la Confederaziun s'aspetta fin la chi's sapcha daplü.

0220 Uffici da fabrica

- 58 Dum. da fabrica no. 022/2020, sanaziun dals tirs da schiibgia (corp da guardgias da cunfini e biatlon), fabricar ora il tir da biatlon, Cumün da Valsot, parcella no. 6038, Ischla Sclamischo, 7558 Strada**

Il manader tecnic spiega l'intent in connex culla sanaziun dals implants da tir da la guardgia da cunfin e quel pel biatlon a Sclamischo. La ditta Geotest ha examinà quant ferm cha'l terrain es contaminà. A man da quellas datas es gnü decis che material chi ha da gnir allontanà. Ils cuosts pella sanaziun dal tir da biatlon sun gnüts calculats a raduond fr. 26'800.00, la part pel cumün s'amunta tenor la calculaziun a fr. 10'700.00. Il manader tecnic fa però quint chi bastaran totalmaing fr. 8'000.00 per far quellas lavurs. Sper la sanaziun es previs da refar l'implant da tir da biatlon. Per pudair far eir in avegnir adöver da quel ha l'infrastructura da gnir modernisada. In collavuraziun cul departamaint federal da finanzas, administraziun da dazi, es in connex cun quist intent gnü formulà üna cunvegna. Quella cumpiglia üna recapitulaziun da las masüras dal concept da sanaziun, il manaschi dal proget cumünivel, üna survista dals partits pertocs, las retscherschas tecnicas chi fuorman la basa pella sanaziun, ün'offerta pels cuosts da realisaziun totals, üna clav da scumpart dals cuosts ed il möd da far giò quint. Ils cuosts tenor offerta s'amuntan a fr. 87'427.65. Scha'ls intents vegnan realisats insembel es da preverer cha quels saran a la fin, grazcha las sinergias chi's po trar a nüz, plü bass. Il scumpart da cuosts es previs da fixar pro 69.35% administraziun federala da dazzi e 30.65% cumün da Valsot. Illa discussiun vegn manzunada l'idea d'integrar las construcziuns planisadas in ün dals cuntschets existents dals tirs a Sclamischo. Prüma füss la fingià avantman forz'electrica e segunda as pudess uschè evitar da reconstruir alch illa cuntrada.

La suprastanza decida d'ir d'accord culla cunvegna pella sanaziun cumünivla cul implant da tir da la guardgia da cunfin e fa bun il credit necessari. Da princip nan decida la suprastanza implü d'ir d'accord cul intent chi vegn construi ün implant da tir pels biatlats. Avant co inviar ils pass necessaris ha la società da biatlats d'examinar schi füss pussibel d'integrar la construcziun planisada ill'infrastructura dal implat da tir da 300m a Sclamischo.

0220 Uffici da fabrica

- 59 Dum. da fabrica no. 013/2020, drenascha cun sfuondraziun, Brosi Dr. Georg Jürg, parcella no. 10314, Griosch 257, 7557 Vnà**

Il petent fa la dumonda per realisar üna drenascha d'aua cun sfuondraziun. La drenascha es previssa da realisar sur chamonna e la sfuondraziun suot chamonna.

La suprastanza va d'accord cul intent e decida da conceder il permiss.

0220 Uffici da fabrica

- 60 Dum. da fabrica no. 014/2020, local tecnic nouv, Caviezel-Mächler Giovanni, parcella no. 6187, La foppa 1-169, 7558 Strada**

Il manader tecnic spiega l'intent in connex culla dumonda inoltrada per realisar ün local tecnic nouv. La realisaziun da quel es previssa illa construcziun existenta suot la terassa. Per avoir ün access sto gnir fatta üna foura il mür ed il material sto gnir allontanà. Plü tard es previss da realisar ün s-chodamaint in quel local.

La suprastanza va d'accord cul intent e decida da conceder il permiss.

0220 Uffizi da fabrica

- 61 **Dum. da fabrica no. 017/2020, ingrondimaint piazza da parcar, Groen Sophia, parcella no. 26, Favgia 208, 7557 Vnà**

Il manader tecnic preschainta la dumonda da fabrica inoltrada in connex culla realisaziun d'ün ingrondimaint da la piazza da parcar. Per realisar quel gnis tut d'avent material da la costa in üna larghezza da raduond 60 cm. L'otezza da la scarpada s'augmainta uschè fin sün circa duos meters. La suprastanza va d'accord cul intent e decida da conceder il permiss culla pretaisa da construir üna saiv sülla scarpada.

0220 Uffizi da fabrica

- 62 **Dum. da fabrica no. 020/2020, renovaziun dal tet e da las fatschadas (rimplazzamaint fanestras), Denoth Marco, parcella no. 323, Poz 27, 7556 Ramosch**

Il manader tecnic preschainta la dumonda inoltrada dal petent. Quel prevezza da rimplazzar diversas fanestras da la chasa, sco eir da refar il tet da la chasa cun quadrels da terracotta culurits cun culur brüna. Implü vegnan pitturadas las fatschas da la chasa. La suprastanza va d'accord cul intent e decida da conceder il permiss.

0220 Uffizi da fabrica

- 63 **Dum. da fabrica no. 010/2020, lobia nouva / fatschada süd, Gmür-Zorzi Paul, parcella no. 279, Schilana 73, 7556 Ramosch**

Il petent ha inoltrà la dumonda adattada per realisar üna lobia nouva. Quella es previs da construir analog las lobgias cha'l figl ha realisà illa chasa daspera. Quel vaiva tschüff il permiss da fabrica per fabricar our dal tablà ün'abitaziun e realisar lobgias cun stachettas da fier. Il petent prevezza da realisar sias lobgias da listessa maniera. La suprastanza va d'accord cul intent e decida da conceder il permiss.

8120 Vias champestras

- 64 **Limitaziun dal pais sün vias champestras**

Tenor reglamaints da vias champestras existan per tuot las vias sül territori dal anteriur cumün da Ramosch limitaziuns da tonnaschas. In connex cun incumbenzas ils gods e da meglioraziun sun i'l passà adüna darcheu gnü miss oura permiss per surpassar quellas limitas. OTRAS incumbenzas sun dafatta gnüdas realisadas sainza cha davart dal cumün es gnü miss oura uschè ün permiss. Diversas situaziuns sun idas oura bain be cun furtüna. Per nu stuvair surtour ün bel di la respunsabilità in connex cun ün accidaint es da decider co inavant, davart da l'uffizi da fabrica e da l'administraziun cumünala nu vegnan a partir da subit miss oura plü ingüns simils permiss. La suprastanza decida cha las premissas da tonnascha han da gnir tgnüdas aint. Ils transports ston gnir fats cun maschinass adequatas (per exaimpel Unimog invezza d'ün camiun). La laina tagliada a Pragiant dess gnir manad'oura cul Unimog. La suprastanza decida implü cha'ls cuosts supraplü pellas incumbenzas cumünalas vegnan surtuts.

0210 Administraziun cumünala

65 Reglamaint davart ils agüds da chatscha

Elecziun d'üna cumischiun

Armon Mayer orientescha ch'in connex cul reglamaing d'agüds da chatscha es gnü decis d'eleger üna cumischiun chi's confuonda dal tema. Quella cumischiun as mettes insembel our da rapreschantants dal cumün da Scuol e da Valsot. Part a la cumischiun dessan far ils suprastants chi suprastan a'l dicasteri, pel cumün da Scuol ün rapreschantant dal cumün da vaschins, implü ün rapreschantant pel uffizi da god, pel uffizi da chatscha e pes-cha, sco duos rapreschantants pellas societads da chatscha da Scuol e Valsot. Pel nos cumün füssan d'eleger Armon Mayer ed Adrian Schorta illa cumischiun. L'elecziun dals rapreschantants pellas societads es roba da quellas. La suprastanza decida d'eleger ad Armon Mayer ed Adrian Schorta illa cumischiun.

9630 Stabels da la facultà da finanzas

66 Vendita da la chasa da scoula Tschlin

Proget CELIN VIVA, Angelo Andina

In connex cul avegnir da la chasa da scoula a Tschlin ha Angelo Andina inoltrà si'idea per realisar alch radschunaivel our da la chasa da scoula a Tschlin. Il capo e la suprastanza vaivan tschüff las actas avant la sezzüda per tillas stübgjar. Illa discussiun dal gremi vegn discus quant correct chi'd es sch'ün commember da la cumischiun inoltrescha ün'idea cun agens interess. Ils commembers vegnan elets cul intent da s'intermetter pels interess publics. Scha quai as cunfà d'esser elet da la suprastanza in üna cumischiun chi s'ingascha pels interess publics e perseguitar a listess mumaint in chosa ün agen interess vegn dubità. Il capo manzuna in quist connex ch'el haja tschüff supraplü ün e-mail dad Angelo Andina. Quel dumonda da pudair tour a fit stanzas da la chasa da scoula a Tschlin. L'organisaziun da turissem prevezza cha our da motivs da coronavirus saran quista sta blers giasts in Engiadina Bassa e chi'd es in quist connex da preverer cha la dumonda davo lets per esters crescharà considerablamaing.

Il proget dad Angelo Andina ha da gnir examinà pür cur chi'd es cler co chi va inavant culla chasa da scoula a Tschlin.

La Baineser SA es amo düna fittadina da la chasa da scoula a Tschlin. Il cumün nu das-cha uschè decider sur dal dar a fit stanzas ad ün terz. Implü vegn decis chi'n quist connex es da surponderar a chi chi'd es da priorisar per dar a fit stanzas. Georg Janett per exaimpel vaiva dumondà sch'el nu pudess tour a fit sur stà stanzas per gruppas. Sco affar chi ha pati suot la crisa da coronavirus füss da priorisar sia dumonda. Però adüna resguardond il contrat valabel.

0120 Executiva

67 OrientaziunsChadaina d'agüd – coronavirus

Ursina Caviezel dumonda scha la sporta in connex culla chadaina d'agüd es amo necessaria pella glied in cumün.

La suprastanza decida cha quist es roba da la cumischiun da catastrofes.

Festa da biera da muntonga / Bergbierfestival

Fadri Riatsch manzuna cha Reto Rauch planisescha insmebel cun Martina Hänzi la festa da biera da muntogna. Previs es da realisar la fin d'october üna gronda festa cun üna tenda ed üna bunischma musica. La saira avant quella festa es implü previs chi chatess lö la radunanza generala. Il capo manzuna ch'el vezza cha quist intent pudess gnir finanzià cun mez turisticas da

l'organisaziun regiunala (TESSVM). In connex culla crisa da coronavirus nu sun gnüts realisats differents events d'urant la stagiun d'inviern. Quels mezs stan dimena a disposiziun per events turistics.

Discoteca a Scuol

Il capo manzuna cha a chaschun da l'ultima conferenza da presidents ha il capo da Scuol orientà cha a Scuol vegn trattà sur da la realisaziun d'una discoteca a Buorna (suot la staziun). In quist connex saja eir gnü chattà ün investur. Per chi sarà insomma pussibel da manar quella gestiun es da preverer chi voul contribuziuns publicas. Our da quel motiv dumon'el pel sustegn dals ulteriurs cumüns da la regiun. L'idea davart dal cumün da Scuol d'eira da sustgnir cun üna cuntribuziun annuala, discussiunà es invezza eir gnü la pussibilità d'una contribuziun unica. Il capo ha in quist connex proponü da ponderar schi nu fess sen d'investir raps dal fonds dal 5% dals cumüns concessiunaris per quist proget. Quai füss in prüma lingia eir ün'investiziun pella giuventüna indigena. La sporta in quist connex es fich pitschna. Our da principi esa però da valütar scha a Scuol as voul trar daplü giuventüna. Culs skis sülla Motta van pelplü famiglias cun uffants, schi sajan daplü giuvenlis sün pista schi pel solit nun es quai uschè adattà pellas famiglias. Quist as vezza in lös da vacanzas d'inviern chi sun drizzats oura sün turissem da festa sco per exaimpel Ischgl.

0120 Executiva

68 Varia (suprastanza cumünala)

Da quista tractanda nu vegn fat adöver.

7556 Ramosch, 11.06.2020



Il capo:

Il manader administraziun: